

TAARIFA YA SERIKALI KUHUSU MATUKIO YA UTEKAJI NA MAUAJI YA WATOTO YALIYOFANYIKA MKOANI NJOMBE

Mheshimiwa Spika, tarehe 04 Februari, 2019 ilitolewa hoja na Mhe Joram I. Hongoli, Mbunge wa Jimbo la Lupembe akiomba utenge walau dakika 20 Bunge lijadili juu ya hali inayoendelea Mkoa wa Njombe ya utekaji na mauaji ya watoto wadogo. Hoja hii iliyoungwa mkono na wabunge wengi ilisemwa pia na Mhe. Deo Sanga Mbunge wa Jimbo la Makambako na baadaye Mnadhimu Mkuu wa shughuli za Serikali Bungeni Mhe Jenista J. Mhagama aliomba Serikali kupatiwa muda wa kuandaa kauli ya Serikali ili watanzania wafahamu hali halisi na hatua zilizokwishachukuliwa na Serikali mpaka sasa.

Mheshimiwa Spika, naomba nitumie fursa hii kutoa historia ya suala hili kwa ufupi. Hivi karibuni kumejitokeza matukio yasiyo ya kawaida ya utekaji na mauaji ya watoto yaliyokuwa yakihusishwa na imani potofu za kishirikina katika Mkoa wa Njombe. Kufuatia matukio hayo hadi sasa watoto saba (07) wa umri chini miaka kumi na sita (16) wameripotwa kuuawa, mmoja (01) kujeruhiwa na wawili (02) kupotea na baadaye kuonekana. Matukio haya yametokea katika maeneo ya Ikando, Matembwe, Mjimwema, Msitu wa Sekondari ya Njombe, Lukosa, Sido na Mfereke. Aidha, uchunguzi unaonyesha kwamba mauaji yamefanyika kwa unyongaji.

Mheshimiwa Spika, Kufuatia taarifa za mauaji hayo, tarehe 28/01/2019 Mheshimiwa Mhandisi Hamad Masauni Naibu Waziri wangu alifanya ziara ya siku mbili Mkoani Njombe ili kufuatilia juu ya hatua zilizochukuliwa na vyombo vya dola katika kutanzua na kuzuia matukio haya sanjari na kutoa maelekezo ya hatua zaidi za kupambana na uhalifu huu. Mpaka sasa hatua zilizochukuliwa na Serikali kama nilivyoainisha awali zimefanikisha kukamatwa kwa watuhumiwa 29 kwa ajili ya uchunguzi na mahojiano zaidi na kazi bado inaendelea.

Mheshimiwa Spika, Pamoja na juhudi hizo za Serikali Jeshi la Polisi na Kamati ya Ulinzi na Usalama ya Mkoa wa Njombe imechukua hatua mbalimbali kuzuia na kutanzua aina hii ya kinyama ya uhalifu. Baadhi ya hatua hizo ni kama ifuatavyo:

- Kutuma timu ya wataalamu wa upelelezi kuvisaidia vyombo vya dola mkoani Njombe kuchunguza matukio haya;
- Kutumia falsafa ya Ulinzi Shirikishi/Ushirikishwaji wa jamii kwa kutoa elimu mashuleni kwa Walimu ili waweze kuwaelimisha wanafunzi kuongeza umakini katika mienendo yao;
- Kutumia vyombo vya habari kutoa elimu kwa wazazi na wananchi kwa ujumla juu ya elimu ya ulinzi na usalama ;
- Kukusanya taarifa fiche za Intelijensia ili kuwabaini na kuwakamata wahalifu halisi waliohusika na matukio na pia kuzuia matukio mengine kutendeka;
- Kufanya vikao na Waganga wa Kienyeji, Viongozi wa Dini, Wazee wa Mila, viongozi wa Kata ili kuweka mikakati thabiti ya pamoja ya kukomesha mauaji hayo;
- Kufanya sensa ya kuwatambua waganga wote wa jadi wanaojihusisha na shughuli za uganga, na kuainisha walio na leseni na wasio na leseni pia kuwabaini waganga matapeli na wapiga ramli chonganishi;
- Kufanya doria na misako kwenye maeneo mbalimbali ya misitu na nyumba za kulala wageni zilizopo pembezoni.

Mheshimiwa Spika, jambo la kushangaza ni kuwa pamoja na Serikali na watanzania wengi kushtushwa na matukio haya, wapo baadhi ya watanzania wenzetu wanaojaribu kutumia matukio haya kuzua taharuki miongoni mwa wanajamii. Kama ilivyoielezwa na waheshimiwa wabunge wakati wa kutoa hoja zao, kumekuwepo na matukio ya watu kuchukua picha za kwenye mitandao zinazoonesha miili ya watoto na kuaminisha wasomaji kuwa ni picha za hivi karibuni mkoani Njombe. Aidha, wapo baadhi ya wananchi wengine waliojaribu kuhusisha matukio haya na itikadi za kisiasa, imani za kidini au shughuli za Kibiashara.

Mheshimiwa Spika, si vyema kuhusisha mauaji haya na itikadi za aina yoyote au shughuli za uzalishaji mali au biashara kwani kwa kufanya hivyo unaweza kuwaingiza katika mzungunguko huo watu wasiohusika. Watu wote 29 waliokamatwa ni wananchi wa kawaida usioweza kuwanasibisha na udini, siasa au biashara. Nashauri tutulie wakati Serikali kupitia wizara yangu tunaendelea kufuatilia na kudhibiti hali hii.

Mheshimiwa Spika, kupitia Bunge lako tukufu nataka niwahakikishie waheshimiwa wabunge na wananchi wote kwamba, kama ambavyo tumekomesha matendo maovu na ya kuchukiza yanayofanana na hili, tutahakikisha wote waliohusika wanaendelea kusakwa, kuhojiwa na kufikishwa katika vyombo vya Sheria bila kujali nafasi zao katika jamii . Hivi ninavyoongea Serikali imetuma timu kabambe yenye Askari na Makachero makini, hodari na mahiri ili kukabiliana na uhalifu huu mbaya.

Mheshimiwa Spika, Bunge lako tukufu lilipitisha sheria ya mtandao, naomba kuchukua nafasi hii kuwaasa wataanzania kuacha kuanzisha na kusambaza taarifa za uzushi kwa nia yoyote ile. Serikali itawachukulia hatua wale wote watakaothibitika kujihusisha na vitendo hivi vya kusambaza taarifa za uchochezi mitandaoni. Aidha, wote waliosambaza taarifa za kuzua taharuki tutawakamata na kuwafikisha mahakamani ili wakajifunze kutumia uhuru wa kujieleza vizuri.

Mheshimiwa Spika, Serikali imesikitishwa sana na matukio ya mauaji ya watoto wetu huko Njombe. Tunamuomba Mwenyezi Mungu awatie nguvu wazazi na ndugu, jamaa na marafiki wote wa watoto waliopoteza maisha. Aidha, naomba niwahakikishie kuwa Serikali yao itahakikisha matukio haya yanaisha na wahusika wote wanatiwa mbaroni na kufikishwa katika vyombo vya Sheria. Hivyo basi, naomba wananchi watulie na waache kujichukulia Sheria mkononi ila waendeleo kutoa ushirikiano kwa Vyombo vya Dola ili kwa pamoja tukomeshe uhalifu huu.

Mheshimiwa spika, nimalizie kwa kusema kuwa mara zote haki hushinda uovu.

Naomba kuwasilisha.

